

欽定全唐文

欽定全唐文卷六百八目錄

劉禹錫十

因論七篇 并引

傷我馬詞

觀市

觀博

昆盧遮那佛華藏世界圖讚 并序

口兵誠 并序

猶子蔚適越誠

佛衣銘 并序

陋室銘

許州文宣王新廟碑

東都留守令狐楚家廟碑

唐興元節度使王公先廟碑

欽定全唐文卷六百八

劉禹錫十

因論七篇 并引

劉子閒居作因論或問其旨曷歸歟對曰因之爲言有所自也夫造端乎無形垂訓於至當其立言之徒放詞乎無方措旨於至當其寓言之徒蒙之智不逮於是造形而有感因感而有詞匪立匪寓以因爲目因論之旨也云爾

鑒藥

劉子閒居有負薪之憂食精良弗知其旨血氣交沴煬然

焚如客有謂予子病病積日矣乃今我里有方士淪跡於
醫厲者造焉而美肥蹶者造焉而善馳矧常病也將子詣
諸予然之之醫所切脈觀色聆聲參合而後言曰子之病
其興居之節舛衣食之齊去聲乖所由致也今夫藏鮮能安
穀府鮮能母氣徒爲美疹之囊索耳我能功之乃出藥一
丸可兼方寸以授予曰服是足以淪昏煩而鉏蘊結消蠱
慝而歸耗氣然中有毒須其疾瘳而止過當則傷和是以
微其齊也予受藥以餌過信而腿能輕痺能和涉旬而疴
養絕焉抑搔罷焉踰月而視分纖聽察微蹈危如平嗜糲

如精或聞而慶予且闕言曰子之獲是藥幾神乎誠難遭已顧醫之態多嗇術以自貴遺患以要財盍重求之所至益深矣予昧者也泥通方而徇旣效猜至誠而惑勦說卒行其言逮再餌半旬厥毒果肆岑岑周體如痞作焉悟而走諸醫醫大叱曰吾固知夫子未達也促和蠲毒者投之濱於殆而有喜異日進和藥乃復初劉子慨然曰善哉醫乎用毒以攻疹用和以安神易則兩躡明矣苟循往以御變昧於節宣奚獨吾儕小人理身之弊而已

訊吐

劉子如京師過徐之右鄙其道旁午有吐增增扶班白絮
羈角齋生器荷農用摩肩而西僕夫告予曰斯宋人梁人
毫人潁人之逋者今復矣予愕而訊云予聞隴西公暢轂
之止方踰月矣今爾曹之來也欣欣然似恐後者其間有
勞來之簿歟蠲復之條歟賑贍之恩歟碩鼠亡歟瘼狗逐
歟曰皆未聞也且夫浚都吾政之上游也自巨盜間釁而
武臣顛焉牧守由將校以授皆虎而冠子男由胥徒以出
皆鶴而軒故其上也子視卒而芥視民其下也驚其理而
蚌其賦民弗堪命是軼於他土然咸重遷也非阡危擠壑

不能違之曩者雖歸歟成謠而故態相沿莫我敢復今聞
吾帥故爲丞相也能清靜畫一必能以仁蘇我矣其佐嘗
宰京邑也能誅鋤豪右必能以法衛我矣奉斯二必而來
歸惡待事實之及也予因浩嘆曰行積於彼而化行於此
實未至而聲先馳聲之感人若是之速歟然而民知至至
矣政在終終也試嘗論聲實之先後曰民黠政煩須理而
後勸斯實先聲後也民離政亂須感而後化斯聲先實後
也立實以致聲則難在經始由聲以循實則難在克終操
其柄者能審是理俾先後始終之不失斯誘民孔易也

嘆牛

劉子行其野有叟牽跛牛於蹊偶問焉何形之瑰歟何足之病歟今穀棘然將安之歟叟攬縻而對云瑰其形飯之至也病其足役之過也請爲君畢詞焉我僦車以自給常驅是牛引千鈞北登太行南並商嶺掣以迴之叱以聳之雖涉淖躋高轂如蓬而輶不償及今廢矣顧其足雖傷而膚尚脂以畜豢之則無用以庖視之則有羸伊禁焉莫敢尸也甫聞邦君饗士卜剛日矣是往也將要售於宰夫予尸之曰以叟言之則利以牛言之則悲若之何予方窺且

無長物願解裘以贖將置諸豐草之鄉可乎叟駭然哈曰
我之活是屈指計其直可以持醪而嚙肥飴子而衣妻若
是之逸也奚事裘爲且昔之厚其生非愛之也利其力今
之致其死非惡之也利其財子烏乎落吾事劉子度是叟
不可用辭屈乃以杖叩牛角而嘆曰所求盡矣所利移矣
是以員能霸吳屬鏤賜斯旣帝秦五刑具長平威震杜郵
死陔下敵擒鍾室誅皆用盡身殘功成禍歸可不悲哉可
不悲哉嗚呼執不匱之用而應夫無方使時宜之莫吾害
也苟拘於形器用極則憂明矣

傲舟

劉子浮於汴涉淮而東亦旣釋紼纒榜人告予曰方今湍悍而舟監宜謹其具以虞焉予聞言若厲繇是裒以室之灰以瑾之斛以乾之僕怠而躬行夕惕而晝勤景霾晶而莫進風異響而遄止兢兢然累辰是用獲濟偃檣弭擢次於淮陰於是舟之工咸霈然自暇或遊肆而觴矣或拊橋而歌矣隸也休役以尚寢矣吾曹無虞以宴息矣逮夜分而窅隙潛澍渙然陰潰至乎淹簣濡薦方卒愕傳呼跣跳登墟僅以身脫目未及瞬而樓傾軸墊抵於泥沙力

莫能支也劉子缺然自視而言曰鄉予兢惕也汨洪波而無害今予宴安也蹈常流而致危畏之途果無常所哉不生於所畏而生於所易也是以越子膝行吳君忽晉宣尸居魏臣怠白公厲劔子西晒李園養士春申易至於覆國夷族可不警哉嗚呼禍福之胚胎也其動甚微倚伏之矛盾也其理甚明困而後傲斯弗及已

原力

劉子於邁舟次泗濱維紉邇之於傳傳吏適傳呼曰乘驛者方來誰何之則曰力人也雅以力聞於吳楚間中貴人

器之謂宜爲爪士獻言於上有旨趣如京師頃其至則乞
焉五輩咸碩其體毅其容動睛煜如曳趾岌如顧瞻遲回
飲啜有聲泗濱守伍由將授也說而勞之饗以太牢飲以
百壺酒酣氣振求試自矜傍如無人中若有憑有盪舟如
沿者挾鼎如飛者綯鍵如麻者開兩弧而脈不償者屣巨
石而齊如流者異哉果以力駭世而聞於上也異日話於
儒家者流有客悻然自奮曰斯誠力矣上之不過夸胡人
而戲角抵次之不過倅期門而振袍服我之力異然以道
用之可以格三苗而賓左衽以威用之可以繫六羸而斷

右臂由是而言彼力也長雄於匹夫然由驛其駢餼其食
我力也無敵於天下亦當蒲其輪鶴其書矣予詰之曰彼
之力用於形者也子之力用於心者也形近而易見心遠
而難明理乎而言則子之力大矣時乎而言則彼之力大
矣且夫小大迭用曷常哉彼固有小矣子固有大矣予所
不能齊也客於邑垂涕洟劉子解之曰屠羊於肆適味於
眾口也攻玉於山俟知於獨見也貪日得則鼓刀利要歲
計而韞櫝多客聞之破涕曰吾方俟多於歲計也歲與歲
歟其吾與歟

說驥

伯氏佐戎於朔陲獲良馬以遺予予不知其良也秣之稊
糝飲之污池廢櫪也上痺而下蒸羈絡也綴索而續韋其
易之如此予方病且窶求活於肆肆之馭亦不知其良也
評其價六十緡將劑矣有裴氏子羸其二以求之謂善價
也卒與裴氏裴所善李生雅挾相術於馬也尤工覩之周
體貽然視听然笑既而抃隨之且曰久矣吾不覩於是也
是何柔心勁骨奇精妍態宛如鏘如煜如翔如之備耶今
夫馬之德也全然矣顧其爲駒藏銳於內且秣之乖方是

用不說於常目須其齒備而氣振則眾美灼見上可以獻
帝閑次可以鬻千金裴也聞言竦焉遂做其僕蠲其阜筐
其惡蚤其溲稚以美薦秣以薶粒起之居之澡之拒之無
分陰之怠斯以馬養養馬之至分也居無何果以驥德聞
客有唁予以喪其實且譏其所買也微予灑然曰始予有
是馬也予常馬畜之今予鬻是馬也彼寶馬畜之寶與常
在所遇耳且夫昔之翹陸也謂將蹄將鬻抵以撾策不知
其籥雲也昔之嘘吸也謂爲疝爲厲投以藥石不知其噴
玉也夫如是則雖曠日厯月將至頓踣曾何寶之有焉繇

是而言方之於士則八十其緡也不猶愈於五羖皮乎客
謾而竦予遂言馬之德也存乎形者也可以目取然猶違
之若此矧德蘊於心者乎斯從古之嘆予不敢歎

述病

劉子嘗涉暑而征熱攻於腠以致病其僕也告痛亦莫能
興逮浹日予有瘳醫診之曰疾幸間矣顧熱疹而未平有
遺類焉宜謹於攝衛衛之乖方則病復矣所苦旣微而怠
其說倦眠於衾而興焉倦隱於几而步焉面不能罷頰髮
不能捐櫛口不能忘味心不能無思如是未移日而疾也

瘳如復瘳於躬進藥求汗凡三渙然後目能視視既分則嚮時之僕已脫然執柶圈侍予於前矣予訝而曰曩吾與若也病偕呻也諄也若酷而吾微藥也餌也吾殷而若薄何患之同而痊之異哉僕諄諄而答云已之被病也兀然而無知有問也亦兀然而無知髮蓬如而忘乎亂面黔如而忘乎垢洎疾之殺也雖飲食是念無滑甘之思日致復初亦不知也予喟然歎曰始予有是僕也命之理畦則蔬荒主庖則味乖顛廢則馬瘠常謂其無適能適乃今以兀然而賢我遠甚利與鈍果相長哉僕更矣劉子遂言曰樂

金定全唐文 卷之百八
於用則豫章貴厚其生則社稷賢唯理所之曾何膠於域
哉

傷我馬詞

馬龍類蓋健而善馳君子之所宜求爲器也故法求於力
或逸而喜駭法求於和或乾而易仆由德稱者鮮焉曩予
知善馬之難遭也不求於肆而於其鄉一旦果得陰山之
阿嬖略其形蕭蕭其鳴長顧遠視順而能力顧其軀非騫
然而偉也雖士得以乘之始予被阜衣於朝朝之人多四
三其牡以迭馭予無兼焉水轍之淋漓淖途之汪洋結爲

碩犖融爲坳堂前有債軻後有濡裳我策垂空我鑣方揚
振鬣軒昂矯如飛翔翹翹其雄也非力而何烈火之具舉
鉤膺之疊舞一蹊千趾駢比齟齬疼者斯擠悍者斯怒我
鞍如山我轡如組弭毛容與宛若孤處靡靡其柔也非慧
而何日予之獲謹於闕下背商顏趣昭邱日中而踰舍修
門之南非騎所宜夷則沮洳高則嶽巖虎咆空林盛鬪荒
虺風雨孤征簡書之威俾予弗顛我馬焉依屑屑其勞也
非德而何予至武陵居沅水傍或踰月未嘗跨焉以故莫
得伸其所長跼躅顧望兮頓其鎖韉飲齧日削兮精耗神

傷寒慙騷騷兮瘁毛蒼涼路聞踐蹠兮逸氣騰驤朔雲深
分邊草遠意欲往兮聲不揚隕然自不得其所而死故其
嗟也兼常初元宗羈大宛而盡有其名馬命典牧以時起
居洎西幸蜀往往民間得其種而蕃焉故良毛色者率非
中土類也稽是毛物豈祖於宛歟漢之歌曰龍爲友武陵
有水曰龍泉遂歸骨於是川且弔之曰生於磧礪善馳走
萬里南來困邱阜青菰寒菽非適口病聞北風猶舉首金
臺已平骨空朽投之龍淵從爾友

觀市

由命士以上不入於市周禮有焉由今觀之蓋有因也元和二年沅南不雨自季春至於六月毛澤將盡郡守有志於民誠信而雩遂遍山川方社又不雨遂遷市於城門之達予得自麗譙而俯焉肇下令之日布市籍者咸至夾軌道而分次焉其左右前後班閒錯跣如在闐闐之制其列題區別榜揭價名物參外夷之貨馬牛有牽私屬有閑在巾笥者織文及素焉在几閣者彫彤及質焉在筐筥者白黑巨細焉業於饗者列饗餼陳粢餌而苾然業於酒者舉酒旗滌盃盃而澤然鼓刀之人設膏俎解豕羊而赫然華

寔之毛豉魚之生交蜚走錯水陸羣狀夥名人隧而分韞
藏而待價者負絜而求沽者乘射其時者奇贏以游者坐
賈禺禺行賈遑遑利心中驚貪目不瞬於是質劑之曹較
固之倫合彼此而騰躍之易良苦於巧言斲量衡於險手
杪忽之差鼓舌僮僮詆欺相高詭態橫出鼓囂譁空煙埃
奮羶腥疊巾履齧而合之異致同歸雞鳴而爭赴日午而
駢闐萬足一心恐人我先交易而退陽光西徂幅員不移
徑術如初中無求隙地俱唯守犬烏烏樂得腐餘是日倚
衡而閱之三感其盈虛之相尋也速故著於篇云

觀博

客有以博戲自任者速余觀焉初主人執握槲之器寘於
廡下曰主進者要約之旣揖讓卽次有博齒二異乎古之
齒其制用骨觚稜四均鏤以朱墨耦而合數取應期月視
其轉止依以爭道是制也通行之久矣莫詳所祖以其用
必投擲故以博投詔之是日客抵骨於局且祝之曰其來
如趣其去如脫事先趨趨命中無蹉跌無從彼呼無俾我
但分曹適迫自朝至於日中是而與所祝異焉客視骨如
有情焉如或憑焉悉詈之不洩又從而齧齧蹂躪之莫顧

其十目之哈讓也乃曰非余術之不工是朽骨者不余界也請刷恥於奕棋主人促命燭以續之驚神默計巧竭智匱主進者書勝負之數於牘視其所喪又倍前籍焉觀者曰以夫人之褊心亦將詬棋而抵枰矣旣乃恬而不恤赧然有失鵠求身之色人咸異之子劉子曰先人者制人博投是已從人者制於人枯棋是已二者豈有數存乎其間哉但處之勢異耳是知當軸者易生嫌而退身者易爲譽易生之嫌不足貶也易爲之譽不足多也在辯其所處而已

已

毘盧遮那佛華藏世界圖讚

并序

佛說華嚴經直入妙覺不由諸乘非大圓智不能信解德宗朝有龍象觀公能於是經了第一義居上都雲華寺名聞十方沙門嗣聲是其上足以經中九會纂成華藏圖俾人瞻禮卽色生敬因請余讚之卽說讚曰

清淨不染花中蓮捧持世界百億千踊出香海浩無邊風輪負之晝夜旋大雄九會化諸天釋梵八部來森然從昏至覺不依緣初初極極性自圓寫之綃素色相全是色非色言非言

口兵誠 并序

余讀蒙莊書曰兵莫慘於志莫邪爲下缺然知志

一作士

之傷夫生也他日讀遠祖中壘校尉書曰口者兵也盡然
知言之爲兵又慘乎志因博考前載極其兩端夫志兵之
薄人激烈抗憤不過無從容於世耳口兵之起其形渥焉
繇是知吾祖之言爲急作誠以書於盤盂

五刃之傷藥之可平一言成疴智不能明人或懼兵道途
奔救投方效技思恐其後人或懼譖比肩狐疑借有紛解
毀輒隨之故曰舌端之孽慘乎楚鐵夷竈誠謀執戈以驅

掩人誠智折筭以

一作

晉賢者誨子信其有旨發言之難

往古猶爾辯爲詐媒默爲德基玉櫝不啟焉能瑕疵鑿麋
深居孰謂可嗤我誠於口惟心之門無爲我兵當爲我藩
以慎爲鍵以忍爲閤可以多食勿以多言

猶子蔚適越誠

猶子蔚晨跪於席端曰臣幼承叔父訓始勾萌至於扶疎
前日不自意有司以名汗賢能書又不自意被丞相府召
爲從事重競累愧懼貽叔父羞今當行乞辭以爲戒余曰
若知彝器乎始乎斲輪因入規矩剗中廉外朽然而有容

者理膩質堅然後加密石焉風戾日晞不刮

一作副

不聲然

後青黃之鳥獸之飾乎瑤金貴在清廟其用也纂以養潔其藏也櫝以養光苟措非其所一有毫髮之傷儻然與破甑爲伍矣汝之始成人猶器之作朴是宜力學爲礪斷親賢爲青黃睦僚友爲瑤金忠所奉爲清廟盡敬以爲纂慎微以爲櫝去息以護傷在勤而行之耳設有人思披重霄而挹顛氣病無階而升有力者揭層梯而倚泰山然而一舉足而一高非獨揭梯者所能也凡大位未嘗曠故世多貴人唯天爵并者乃可偉耳夫偉人之一顧踰乎華章而

一非亦慘乎黥則行矣慎諸吾見垂天之雲在爾肩腋間矣昔吾友柳儀曹嘗謂吾文雋而膏味無窮而炙愈出也遲汝到丞相府居一二日袖吾文入謁以取質焉丞相吾友也汝事所從如事諸父借有不如意推起敬之心以奉焉無忽

佛衣銘 并序

吾既爲僧琳撰曹溪第二碑且思所以辯六祖置衣不傳之旨作佛衣銘曰

佛言不行佛衣乃爭忽近貴遠古今常情尼父之生土無

一里夢奠之後履存千祀惟昔有梁如象之狂達摩救世
來爲醫王以言不痊因物乃遷如執符節行乎復闢民不
知官望車而畏俗不知佛得衣爲貴壞色之衣道不在茲
由之信道所以爲寶六祖未彰其出也微旣還狼狽憬俗
蚩蚩不有信器眾生曷歸是開便門非止傳衣初必有終
傳豈無已物必歸盡衣胡久恃先終知終用乃不窮我道
無朽衣於何有其用已陳孰非芻狗

陋室銘

山不在高有德則名水不在深有龍則靈斯是陋室惟吾

德馨苔痕上階綠草色入簾青談笑有鴻儒往來無白丁
可以調素琴閱金經無絲竹之亂耳無案牘之勞形南陽
諸葛廬西蜀子雲亭孔子云何陋之有

許州文宣王新廟碑

歲在丙辰元日開成許州牧尚書杜公作文宣王廟暨學
舍於兌隅革故而鼎新也前年公受社與鉞且董淮揚汝
南之師八月上丁釋菜於宣父之室陋宇荒階不足迴旋
已事而歎乃詢黃髮有鄉先生前致辭曰自盜起幽陵許
爲兵衝連戰交梓率無寧歲耳悅鉦鼓不聞絃歌目不知

書不害爲智邇來生聚教養起居祖習一出於軍容今幸
天子憐許民爲擇賢侯此人人思治之時也公曰諾吾當
先後之於是元年修戎律以通衆志次年成郡政以蠲民
瘼季年崇教本以厚民風我言旣從乃卜新宮翼水之瀕
城池在東登登其杵坎坎其斧繩之墨之鑿杓枝梧載塗
載奐馱焉陵虛寢廟宏敞齋宮嚴閔軒墀廂廡儼雅清潔
門庭牆仞望之生敬外飾觚稜中設黼幄嚮明當宁用王
禮也堯頭禹身華冠象佩之容取之自邠魯及門覩奧偶
形畫像之儀取之自太學尊彝籩豆青黃規矩之器秉周

禮也犧牲制幣薦獻升降之節遵國章也藏經於重檐斂
器於皮櫝講筵有位鼓篋有室授經有博士督課有助教
指蹤有役夫洒掃有廟幹公又割隙地爲廣圃蒔其柔蔬
而常菹旨蓄之御備捨已俸爲子錢榷其孽羸而鹽酪釭
膏之用給濟濟莘莘化行風驅家慕恭儉戶知敬讓父誨
其子兄規其弟不遊學堂與撻市同繇是縻勇爵戴鶡冠
者往往弭雄姿而觀習禮義矜甲冑者知根於忠信服縵
胡者不敢侮縫掖教化之移人也如置郵焉冬十一月許
人以新儒宮成來告且乞辭欲行乎遠也公名悰字永裕

故丞相岐國公之孫岐公弼諧三帝碩學冠天下嘗著書
二百餘篇言禮樂刑政古今損益統名曰通典藏在石室
副行人間今孝孫聿修之形乎事業播於聲詩懿哉能世
其家也禹錫昔年忝岐公門下生四參公府近年牧汝州
道許昌躬閱其政故不得讓遂銘於麗牲之碑銘曰

許介韓魏四征之地兵興已還其闕嘖嘖亦有儒宮軋於
兵間賢族戾止思樂泮水俾人嚮學王化之始便地爰相
新規鬱起廟貌斯嚴堂皇有煒秩秩禮物祁祁胄子入於
門牆如造闕里春誦夏絃載揚淑聲風於閭閻浹於郊垌

途讓斑白家尊父兄與化而遷其猶性成昔之委巷相詬
交侮今逢親戚不道媒語昔之連營誇力使酒今遇賓客
斂容拱手魯有泮林鳥革其音許崇學教民悅其教鑄於
圭石以志新廟

東都留守令狐楚家廟碑

今上元年七月十三日汴州刺史宣武軍節度副大使知
節度事汴宋亳等州觀察處置使銀青光祿大夫檢校禮
部尚書兼御史大夫上柱國彭陽縣開國伯令狐公西嚮
拜章上言守臣楚蒙被恩澤列爲元侯得立家廟以奉常

祀制書下其奏於有司於是善相考祥得地於京師通濟里居無何新廟成公以守藩故申命季弟監察御史定卜牲練日越八月丁亥祔享三室埴墉以尚幽設幄以迎精禮無尤違神用寧謚第一室曰秦州上邽縣尉諱濬以妣太原王氏配第二室曰綿州昌明縣令贈吏部尚書諱崇亮以妣贈太原郡夫人河東柳氏配第三室曰太原府功曹參軍贈太子太保諱丞簡以妣贈魏國太夫人富春孫氏配明年十月公由浚郊以介圭入覲真拜戶部尚書進爵爲魯侯旣辭戎旃得以列侯謁三廟是歲南至上不視

朝又得以時展祭先期致齋栗然以敬既齋盡志歆然永
思奉其百順陳以具物始躋而虔恭終獻而汎瀾既卒事
顧麗牲之石宜有刊紀乃俾家老授其牒於所知云令狐
晉邑也晉大夫魏顥以輔氏之功始封焉其易名曰文國
語所謂令狐文子是也其先周文王之昭畢公高之裔畢
萬爲晉卿始封於魏自萬至顥蓋四世其後三十七世藍
田侯虬仕拓跋魏爲燉煌郡太守子孫因家遂占數爲郡
人藍田之孫熙在隋爲納言惟上邽府君納言之元孫道
克肖而位不至惟尚書府君西州之右族光未耀而德已

基惟太保府君志爲君子儒以明經居上第調補陽安縣
主簿歷正平縣尉汾州司法參軍陝西大都督府兵曹終
於太原府首掾始以顓經進旣仕旁通百家愛穀梁子清
而婉左邱明國語辨而工司馬遷史記文而不華咸手筆
朱墨究其微旨愷悌以肥家信誼以急人德充齒耄獨享
天爵故休祐集於身後徽章流乎佳城凡以子貴承澤降
命書告第者始贈尚書祠部郎中再贈禮部尚書三加右
僕射四進太保五爲上公先夫人亦四徙封密印纍纍邦
族聳慕生三子皆才彭陽公爲嗣次子從端實肅給今爲

檢校膳部郎中參河東軍事季子前所謂監察御史今主
柱下方書溫敏而有文綽綽然真令兄弟惟彭陽公以詞
筆取科名累參侍從由博士主尚書牋奏典內外書命遂
登樞衡言文章者以爲冠擁節總戎率身和衆留惠於盟
津變風於浚都言方略者以爲能夫浚師嘆喏難治乘釁
竊發寔成習俗莅政五載飲和革心束馬來朝熊羆隕涕
問公還期觴必祝之留爲常伯旋命居守汴人聞公之東
近而愈懷翹翹瞿瞿盡西其首言遺愛者可紀焉貴而率
禮老而能慕怵惕乎霜露齋莊乎廟祧睦其仲季施其鄉

黨言孝悌者歸厚焉勒銘於碑以代彝鼎銘曰

已孤之孝莫如備物顯彼新廟四阿三室時維仲月卜用
柔日醎醴苾芬牲牲博膋邊甌在堂蕭管在庭孝孫蒸蒸
躬若捧盈低簪委紳薦俎登劔膾蠶交感流涕緣纓禮以
備儀誠以致美祖考來格錫之休祉工祝告訖退循軒祀
乃授風人作詩以紀猗歟彭陽之寵光佐憲皇穆穆皇皇
西省東臺迭爲侍郎國之大柄咨爾平章敬宗凝旒俾鎮
雍邱入爲地官令守東州彭陽之忠厚宜介福以壽東郊
旣釐可復朝右縣縣其胄系於周舊由我顯起必昌其後

大和紀元作廟之首刻碑廟門龍集巳酉

唐興元節度使王公先廟碑

唐制五等有爵服而無山川登於三事得立四廟備物崇祀以交神明敬先報本以輔孝治有國之令典也惟長慶三年前相國王公始卜廟於西京崇業里公時鎮劍南東川上章曰臣涯官秩印綬品俱第三請如式以奉宗廟制曰可是歲仲冬申命長男孟堅祔其主於三室明年公入爲御史大夫復以十二月躬行烝祭間歲公出梁州就拜司空禮崇異數廟加祀室大和二年增新室旣成祔顯考

於尊位告饗由禮觀之者以爲世程第一室曰上儀同幽州別駕府君諱元政以妣博陵崔氏配第二室曰湖州安吉縣令贈尚書刑部員外郎府君諱寔以妣贈扶風縣太君馬氏配第三室曰朝散大夫青州司馬贈戶部侍郎府君諱祚以妣贈武威郡太夫人賈氏配第四室曰温州刺史贈太尉府君諱晃以妣贈魯國太夫人博陵崔氏配初周王太子晉遇浮邱公化爲神仙時人號曰王家其後遂以命氏顯於秦者曰翦三世將秦師子孫分居晉代間東漢有徵君霸霸孫甲亦號徵君徙居祁縣爲著姓故至於

今爲太原人自漢涉魏益以熾昌凡十葉至後魏度支尚書廣陽侯罔廣陽有二子神念神感神念南奔梁神感北仕齊惟儀同府君廣陽侯五代孫也唐興於太原寔從義旗佐成王業故有開府儀同之寵惟刑部府君以功臣子理二邑不躋貴仕故有錫羨後大之祥惟戶部府君幼孤以孝聞於鄉曲未冠以文售於有司由前進士補延州臨安縣主簿會詔徵賢良策在甲科授瀛州饒陽尉歲滿遷渭南天后在神都而東畿差重遂由渭南轉河陽適逢建萬象神宮甸內吏分董其役因上書切諫繇是名益聞開

元初以大理司直馳軺車聯讞大獄聞禹朔漠所至決平
早以欒棘傷生晚成劇恙樂就夷曠故不至大官惟太尉
府君生於治平時以文學自奮年十有五賁然從秋賦明
年春升名於司徒又一年元宗御層樓發德音懸文辭政
術科以置髦士府君策最高授太常寺太祝未幾復以能
通道德南華沖虛三真經進整屋尉天寶中厯右拾遺左
補闕禮部司駕二員外郎屬幽陵亂華遣兵南服因佐閩
粵改檢校比部郎中行軍司馬時中原甫寧江南爲吉地
二千石多用名德乃以府君牧溫州朝廷虛公卿以俟高

第及聞訃永嘉人輟春罷社薦紳間以不淑相弔焉雖位
負於道而邁德垂矩後之人得以纘承丕揚之其儲休敬
祐有自云爾生三子皆聰明絕人長曰沼以神童仕至檢
校禮部郎中次曰潔以奇文仕至國子司業今代郡公寔
季子也早在文士籍射策連中咸世其家貞元中德宗聞
其名自藍田尉召入禁中視草厥後三典書命再參內庭
憲宗器之付以國柄翊贊有道雖策免常居大僚今年自
梁州請覲上思用舊臣爲羽儀遂領太常其公府如故以
一心事六君顯官重務靡不揚歷且夫起諸生至三公而

心愈卑道益廣出授黃鉞以臨諸侯入服華章以謁家廟
追崇極大位血食備多室享全榮而奉昭薦嗚呼公侯之
孝歟宜書廟器以視喬公之三鼎其詞曰

闕宇神庭邃清而嚴上公之儀四室耽耽犧以潔牲粢以
大糝交神尚敬合魂尚氣子姓宗工駿奔奉事副笄侈袂
儼恪居次孝孫兢兢執爵而升以裸以濯以伏以興水陸
具來羶薌畢登列於園方其器增增乃禴乃嘗敬而追遠
二昭二穆孝以尊本瞻瞻几幄踳踳堂闔禮成起慕涕落
元袞濡露踐霜誰無永懷不如達者哀與榮偕逢時奮庸

誰不得位不如仁人以道爲貴惟公之達今名以顯親惟
公之仁今德以澡身六朝之清臣一代之全人宜其世家
翼翼振振罔不肅祗於廟之門

欽定全唐文卷六百九目錄

劉禹錫十一

唐故朝議郎守尚書吏部侍郎上柱國賜紫金魚
袋贈司空奚公神道碑

高陵令劉君遺愛碑

唐故邠寧慶等州節度觀察處置使朝散大夫檢
校戶部尚書兼御史大夫賜紫金魚袋贈右僕
射史公神道碑

唐故福建等州都團練觀察處置使福州刺史兼

御史中丞贈左散騎常侍薛公神道碑

唐故宣歙池等州都團練觀察處置使宣州刺史

兼御史中丞贈左散騎常侍王公神道碑

唐故監察御史贈尚書右僕射王公神道碑

欽定全唐文卷六百九

劉禹錫十一

唐故朝議郎守尚書吏部侍郎上柱國賜紫金魚
袋贈司空奚公神道碑

嗚呼有唐清臣尚書吏部侍郎奚公貞元十五年十月甲
子薨於位詔贈禮部尚書太常考行諡曰某是歲臘月丁
酉葬於萬年縣之某原後三十有四年子爲諸侯爲大夫
門戶有煒於是門下生琢石紀德揭於新阡云公諱陟字
殷衡其先在夏爲車正以功封於薛下古以降爲譙郡人

或因仕適楚復之秦今爲京兆人隋唐之際再世以明經爲博士家有賜書曾祖簡亦以文學爲太子司議郎大父乾繹仕至光州刺史烈考諱某有道而尚晦終徐州司功參軍贈和州刺史由子貴也天以大運生萬物而以正氣鍾賢人至和來宅其德乃具公實有焉幼而擢陵茗之秀長而成清廟之器羣倫月旦咸以第一流處之及從鄉賦洎升名太常果居上第明年詔郡國徵賢良設四科以盡材公居文詞清麗之目授宏文館校書郎時德宗新卽位聲烜虜庭西戎畏威底貢內附詔諫議大夫崔河圖持節

卽虜帳以報之使臣欲盛其賓寮以自大遂嘿表公爲介授大理評事除書到門公方爲人子不敢許以遠稱病弗果行歸寧壽春養志盡敬丞相楊炎勇於用材擢公爲左拾遺奉安輿而西未幾再集茶蓼居後喪將闋是歲建中四年京師急變黃屋順動狩於巴梁公徒行間道以歸王所旣中月而詔授起居郎充翰林學士創鉅愈遲病不拜職改太子司議郎從大駕回入尚書爲司金元士且參權筦之務有頃持愍冊宣恩於薊門將行錫銀朱於青蒲上復命稱旨轉吏部員外郎是曹在南宮爲眉目在選士爲

司命公執直筆閱簿書紛拏盤錯一瞬而剖時文昌缺左
右丞都曹差重遂轉左司郎中尋遷中書舍人執事者繫
公識精以斟酌大政非獨用文飾也會江淮間民被水禍
上愍焉特命公宣撫之許以便宜及物赤車所至如東風
變枯條其利病復奏咸可轉刑部侍郎時主計臣延齡以
險刻貴倖而與京兆尹相惡以危事中之尹坐譴已又逮
繫其吏峻繩之事下司寇主奏議者欲文致而甘心焉公
侃然持平挫彼嶽嶽君子聞之善其知道不私刑曹既清
以餘刃兼領選事居一年授權知吏部侍郎又一年卽真

是秩言能審官者本朝有裴馬盧李四君子物論以公媿
焉時得病發癰有國醫方直禁中上促遣如第且敕之曰
某賢臣也悉術以治之及有司以不起聞上震悼加等公
娶瑯琊王氏石泉公之曾孫友壻皆一時彥士長子某蚤
不祿第二子敬則歷太僕少卿今爲濮州刺史兼侍御史
中丞錫金紫以課最就加貴秩俾視九卿第三子敬元以
詞藝似續登文科歷左補闕今爲尚書刑部郎中第四子
旻舉進士最小子某咸砥礪纂修宜爲名公家子其邁德
垂裕之光也乎公少以名器自任及顯達急於推賢視其

所舉則在西省薦權丞相由右史掌訓辭在中銓表揚僕射由地曹郎綜吏部二公後爲天下偉人凡執文章權衡以揣量多士一入中禁考策詞三在天官第章句披沙剖璞由我而顯者落落然居多推是風鑿移於大冶則鎔範之內無非祥金嗟乎天不遐其福而孤民望使由庚之什不作於貞元中惜也初公旣終詔贈大宗伯後以第三子在郎位被霈澤再追褻至司空故昔之葬儀用常伯而今之碑制用三公云銘曰

仁麟智龍爲瑞一辰未若君子瑞於人倫惟唐德宗道類

漢宣責實繩下風稜言言公丁斯時籍在雋賢從難表節
執羈而還帝曰汝器黃流瑟然可爲大寮左右化源乃飾
王度乃馳輜軒旣執刑柄亦操吏權陽和熙熙貯在顏間
守法持正疑如秋山火不侵玉倖臣畏伏鳳鳴祥煙梟噪
低跽帝方倚用天不假年公寐無寤其名愈遠門人達者
赤舄元袞公居甚卑其德愈尊兩子朝服駢驅朱輪佳城
何在胄貴之里螭首龜趺德輝是紀嗚呼後人下拜於此

高陵令劉君遺愛碑

縣內之大夫鮮有遺愛在其去者蓋邑居多豪政出權道

非有卓然異績結於人心浹於骨髓安能久而愈思大和
四年高陵人李仕清等六十三人思前令劉君之德詣縣
請金石刻之縣令以狀申於府府以狀考於明法吏吏上
言謹按天寶詔書凡以政績將立碑者其具所紀之文上
尚書考功有司考其詞宜有紀者乃奏明年八月庚午詔
曰可令書其章明有以結人心者揭於道周云涇水東行
注白渠醜而爲三以沃關中故秦人常得善歲按水部式
決洩有時畎澮有度居上游者不得擁泉而顛其腴每歲
少尹一人行視之以誅不式兵興以遷寢失根本涇陽人

果擁而顛之公取全流浸原爲畦私開四竇澤不及下涇
田獨肥他邑爲枯地力旣移地征如初人或赴訴泣迎尹
馬而上涇之腴皆權倖家榮勢足以破理訴者復得罪繇
是咋舌不敢言吞冤含忍家視孫子長慶三年高陵令劉
君勵精吏治視人之瘼如癩疽在身不忘決去乃修故事
考式文暨前後詔條又以新意請更水道入於我里請杜
私竇使無棄流請遵田令使無越制別白纖悉列上便宜
掾吏依違不決居二歲距寶曆元年端士鄭覃爲京兆秋
九月始具以聞事下丞相御史御史屬元谷實司察視持

詔書詣白渠上盡得利病還奏青規中上以谷奉使有狀
乃俾太常撰日京兆下其符司錄姚康士曹掾李紹實成
之縣主簿談孺直實董之冬十月百眾雲奔憤與喜并口
謠手運不屑鼙鼓揆功什七八而涇陽人以奇計賂術士
上言白渠下高祖故墅在焉子孫當恭敬不宜以畚鍤近
阡陌上聞命京兆立止絕君馳詣府控告具發其以賂致
前事又謁丞相請以顙血汗車茵丞相彭原公斂容謝曰
明府真愛人陛下視元元無所恪第未周知情僞耳卽入
言上前翌日果有詔許訖役仲冬新渠成涉季冬二日新

堰成駛流渾渾如脈宣氣蒿荒漚冒迎耜釋釋開塞分寸
皆如詔條有秋之期投鍤前定孺直告已事君率其寮躬
勞徠之烝徒謹呼奮襁褓而舞咸曰吞恨六十年明府雪
之槩姦犯豪卒就施爲嗚呼成功之難也如是請名渠曰
劉公而名堰曰彭城按股引而東千七百步其廣四尋而
深半之兩涯夾植杞柳萬本下垂根以作固上生材以備
用仍歲旱沴而渠下田獨有秋渠成之明年涇陽三原二
邑中又擁其衝爲七堰以折水勢使下流不厚君詣京兆
索言之府命從事蘇特至水濱盡撤不當擁者繇是邑人

享其長利生子以劉名之君諱仁師字行輿彭城人武德
名臣刑部尚書德威之五代孫大厯中詩人商之猶子少
好文學亦以籌畫干東諸侯遂參幕府厯尹劇縣皆以能
事見陟率不時而遷既有績於高陵轉昭應令俄兼檢校
水曹外郎充渠堰副使且錫朱衣銀章計相愛其能表爲
檢校屯田郎中兼侍御史幹池鹽於蒲錫紫衣金章歲餘
以課就加司勳正郎中執法理人爲循吏理財爲能臣一
出於清白故也先是高陵人蒙被惠風而惜其捨去發於
胸懷播爲聲詩今采其旨而變其詞志於石文曰

噫涇水之逶迤溉我公兮及我私水無心兮人多僻錮上
游兮乾我澤時逢理兮官得材墨綬縈兮劉君來能愛人
兮恤其隱心旣公公兮言旣盡縣申府兮府聞天積憤刷兮
沈疴痊劃新渠兮百畝流行龍蛇兮止膏油遵水式兮復
田制無荒區兮有良歲嗟劉君兮去翱翔遺我福兮牽我
腸紀成功兮鐫美石求信詞兮昭懿績

唐故邠寧慶等州節度觀察處置使朝散大夫檢

校戶部尚書兼御史大夫賜紫金魚袋贈右僕

射史公神道碑

僕射名孝章字得仁本北方之強世雄朔野其後因仕中國遂爲靈武建康人曾祖道德贈右散騎常侍封懷澤郡王祖周洛銀青光祿大夫檢校太常卿兼御史中丞北海郡王贈太子太保考憲誠早以武勇絕人積功至魏博節度使終於河中晉絳慈隰等州節度觀察使檢校司徒兼侍中河中尹贈太保其薨也大臣中書令晉國公裴氏爲之碑其名益顯公卽侍中之元子母曰冀國夫人李氏幼而聰悟父母賢而加愛焉及長好學遷善秀出儕輩鄴下諸兒號爲書生元和中太尉愬爲魏帥下令掄材於轅門

取大將家翹秀者爲子弟軍列於諸校之上公獨昌言願
效文職太尉深奇之遂假魏州大都督府參軍長慶二年
常山眾叛害其帥沂國公田司徒於帳下沂公發迹於魏
人猶懷之詔命其子布以尚書授鉞統魏兵問罪於此疆
且報家禍布既啟行士氣不振渙然內潰獨與冗從之旅
偃旗而歸百憤攻中卒自引決先侍中時爲中軍都知兵
馬使兼御史中丞全師在野闕然推戴之請爲假侯以鎮
定中貴人飛驛上聞穆宗夜召翰林學士草詔書以眞侯
命之實有魏土從眾而合權也是歲公自攝官轉本府士

曹參軍兼監察御史賜朱衣銀印推恩以及子也一旦跪於父母前進苦言曰臣竊惟大河之北地雄兵精而天下賢士心侮之目河朔間視猶夷狄何也蓋有土者多乘兵機際會非以義取今臣家父侯母封化爲貴門君恩至矣非痛折節礪行彰信於朝廷無以弭識者之譏寤明君之意節著於外福延於家乘時蹈機禍不旋踵言訖泣下數行父俞母贊天性交感三心旣叶萬眾潛化天子聞而嘉之曰彼真孝子乃授檢校太子左諭德兼侍御史充節度副使累遷至散騎常侍兼御史大夫賜金印紫綬旣貳軍

政事如命卿弛張損益得以參決潛革故態人知嚮方大
和二年滄景節度使李全略卒其子同捷竊據故地詔下
以文誥弗革遂用大刑先侍中表請率先諸侯使元子以
督戰制曰可公承君父之命乃捐其軀一舉而下平原壓
滄壘由是加工部尚書及王師凱旋上表願一識承明廬
詔允之遂赴北闕下得覲於便殿上曰嚮吾始征滄州議
者皆曰彼魏之姻也慮陰爲寇謀吾發使數輩以偵之其
還也僉曰爾父憑款於賓筵爾母抗詞於簾下願絕姻以
立效其經始啟發出於爾心今滄海砥平策勳之日宜貴

爾三族命爾父爲侍中遷鎮於近地加爾禮部尚書折相
衛澶三州爲鎮以居之俾爾一門大榮以誇天下公拜稽
首謝父遷讓已爵禮無違者翼日下詔於明庭人咸曰史
氏之寵光古無有也牙旗碧幢方指東道侍中以帳下生
變聞泰極而否當歌而哭迎柩於路仰天長號因葬於洛
陽之北邙山冀國夫人祔焉寢苦枕塊以所仇同天爲大
酷未幾詔舉金革之義起爲右金吾將軍累表陳乞有司
以違命督之輿疾卽路間歲擢授鄜坊丹延等州節度觀
察處置等使居四年遷鎮於滑一歲入爲右領軍衛大將

軍旋改右金吾大將軍又受鉞於邠土孟秋至治所首冬
遭疾拜章入覲不克展和鸞幃革之儀薨於靖恭里之私
第享齡三十有九當開成三年十月二十日上聞而悼之
不視朝一日贈尚書右僕射明年二月歸葬於洛都夫人
瑯琊王氏祔焉繼室深澤縣君博陵崔氏有一子曰煥生
七年而孤僕射之喪自復魄至葬當門戶備祭祀建碑表
皆縣君之能且命其家老具事功來請曰嫠不恤家而憂
幼嗣不知其先人之官業乞詞以傳於後也君子以爲知
禮謹書之銘曰

斗極之下崆峒播氣鍾於侍中孔武且貴奉上致命宜昌
後嗣僕射承之良弓不墜耳煩鉦鼓心悅文字虎穴之中
生此騏驥大和紀元滄景不度子弄父兵跳踉海壖有鄰
陰交蝟起雞連詔下薄伐良隅騷然時維侍中寔統魏師
蓄銳未發衆心危疑僕射爲子陳謀盡詞興言涕零有感
尊慈絕姻效節精貫神祇滄波底寧王命褒之乃遷元侯
來鎮近畿乃祚元子別建旌麾一門四節焜燿當時倏忽
變生魏郊紛披喬木雖大盲風不知干雲之臺列缺焚之
哀哀孝嗣丁此大酷迎護幃輅葬於東洛訴天觸地血染

縑服禮有金革詔書敦促不遂枕戈驟膺推轂雕陰白馬
暨於邠谷雖榮三鎮不荷百祿綺紈之間珪組纍纍如彼
晨葩日中而萎有妻名家有子稚齒行號報禮歸寔蒿里
洛水之陽修邨之趾昭尊穆敬幽顯同理舊松新柏亦象
喬梓刻石記功垂於萬祀

唐故福建等州都團練觀察處置使福州刺史兼
御史中丞贈左散騎常侍薛公神道碑

薛在三代爲侯國介於鄒魯間傳世三十有一爲齊所并
其公子犇楚錫土田於沛漢末避仇之成都曹魏平蜀徙

家汾陰遂爲河東臨晉人自奚仲爲夏車服大夫距今數
千年乘軒服冕舄奕冠世言氏族者署爲關內甲姓天意
若曰始有功於車服錫爾子孫世世有之公諱審字某曾
祖寶允以名家子且有學行歷尚書郎雍州司馬邠州刺
史王父繪有雋材刺三郡金密縣皆以治聞累績至銀青
光祿大夫封龍門侯烈考承矩以文亡害仕至大理丞公
幼承前人之覆露補崇文生歲滿調主簿書於毫之譙苦
二邑又尉於東畿之河清貞元中上方與丞相調兵食思
得通吏治而習邊事者計相以公爲對乃授監察御史裏

行充京兆水運使局居雁門主穀糴具舟楫募勇壯且便
弓矢者爲榜夫千有餘人隸尺籍伍符制如舟師詔以中
貴人護之聲震塞上每發粟泝河北行涉戎落以饋緣邊
諸軍及乘障者雖河塞迴遠必尅期如合符一歲中省費
萬計累加侍御史內供奉賜緋魚袋有司條白其勞入拜
殿中內史未幾淮海節將以戎倖缺聞事下丞相御史擇
可者僉曰公政事已試遂授檢校戶部員外郎兼御史淮
南軍司馬尋轉駕部郎中錫以金紫遇府遷申命真相趙
國公帶中書侍郎代之公主行臺留務趙公文茵及境視

置郵供帳及郊視將迎部伍下車視簾幃器備乃曰信奇才也此不足以展驥朝廷知之擢爲泗濱守旣報政就加御史中丞俄遷福建都團練觀察使閩有負海之饒其民悍而俗鬼居洞砦家桴筏者與華言不通公兼戎索以治之五州民咸悅元和十年某日薨於位年六十七贈右散騎常侍夫人趙郡李氏無兒早世繼夫人隴西李氏檢校禮部尚書河東節度使說之女生子凝爲嗣季子茂宏以諸侯禮儀返葬故里蛾眉原從周也後二十有三年元曰開成凝爲平盧從事謹按令甲礮碑石來乞辭以垂於悠

久初公治粟於朔陞愚方冠惠文冠察行馬外事聆風相
厚謂可妻也以元女歸之明年愚入尚書爲郎職隸計司
因白計相公召來會府行有日矣遇內禪惟新愚以緣坐
左貶間關外役竟不克面然而公之爲德善灌注心耳孝
悌爲根抵誠明枝葉之直方爲天質禮讓緣飾之所至藹
然繇此道也公初下世故人丞相李太師誌其墓略曰宏
深莊重幹敏絕人此與游者傳信之詞也豈誣也哉故作
銘曰

河汾齋淪鼎氣敵雲散爲昌光凝爲賢人常侍之生其宗

孔碩從祖昆弟詵詵三百文館入仕幽龍未光尺木爲階
俄然欲翔司會知材績宣朔方邊師萬喉俟我羸糧泝於
黃河路出戎疆募乃勇士皂衣挽航膺索臂弧穹廬在旁
虜聞公名憚不敢數安北已南列城相望率有儲待皆成
金湯入居殿中分巡輦下淮海軍大往爲司馬軍中之治
可移諸民乃牧於泗乃廉於閩閩悍而囂夷風脆急恩信
綏之委然如螫閩方不淑天奪其福公薨於寢元賴以復
天王廢朝贈之金貂莓莓晉原鬱鬱中條大墓舊阡松楸
蕭蕭笳鼓以歸德音孔昭

唐故宣歙池等州都團練觀察處置使宣州刺史

兼御史中丞贈左散騎常侍王公神道碑

常侍諱質字華卿始得姓自周靈王太子晉賓天而僊時人曰王子因去姬爲王氏自秦漢以還世多顯名由今而上十有一代名傑仕元魏爲并州刺史子孫因家遂爲太原祁人并州六代孫名通字仲淹在隋朝諸儒唯通能明王道隱居白牛谿游其門皆天下雋傑著書行於世旣沒諡曰文中子文中生福祚爲蔡州上蔡主簿上蔡生勉舉進士試賢良皆上第仕至河中府寶鼎令寶鼎卽公之曾

祖也祖諱怡渝州司戶參軍考諱潛揚州天長縣丞贈尚書吏部郎中公其季子也始文中先生有重名於隋末其弟勣亦以有道顯於國初自號東臯子文章高逸傳在人間議者謂兄以大中立言弟游方外遂性三百年間君子稱之雖四夷亦聞其名字公雅有遠志常自忖度我大名之後不宜無見焉遂力學厚自淬琢於春秋得之公是於禮得之約僑居淝水上躬督穡事善積於已而淮楚間羣彥多與之游公慊然自少無進取意與游者激之曰卿文儒家子篤志如是盍求發聞俾家聲不頽今夫以文字芒

洋當世者誰如華卿庸自棄耶入謀於閨門咸以外言爲是因決策而西上在貢士籍天和內充不以時尚屑意角逐攻取初無此心如梗枏生於深林未始自貴而度材者一盼歆然在懷故以不爭而速售既登第東諸侯交辟之從主者書記於嶺南授正字參謀於淮右進協律郎其後佐許下暨梓潼南梁率爲上介官至兼監察御史司憲聞其賢徵入南臺轉殿內厯侍御史改尚書戶部員外郎復爲知己所薦遷檢校司封郎中攝御史中丞紫衣金章充山南西道節度副使入爲尚書戶部郎中以方雅特立除

諫議大夫會宋丞相坐狷直爲飛語所陷抱不測之罪大
寮進言無益公率諫官數輩日晏伏閣上爲不時開便殿
公於旅進中獨感激雪涕居多由是上怒稍懈得從輕比
公終以言責爲憂求爲虢州刺史宰相惜去又重違誠請
增之以兼御史中丞用示異於人也大凡以智謀而進者
有時而衰以樸厚而知者無跡而固公雅爲今揚州牧贊
皇公所知人不見其迹方在虢略贊皇入相擢爲左曹給
事中凡有大官缺必寵薦居數月遷河南尹又未幾鎮宛
陵是三者中外所注意不旬歲而周歷之時論不以爲黨

河南帝之別京其治尚體度風采而別白區處之宣城國之奧壤其治在東吏惠下蘇疲羸讐剽輕而勞徠澄汰之公兩得其道不由一揆率身以儉而素風存任人以誠而羣務舉遇中貴以禮而故態革內潔其志下盡其忠外無以撓其理三者具求政之有裨曷由哉在鎮三載開成元年十二月八日薨於位享年六十八監軍使上言有詔軫悼不視朝贈左散騎常侍明年八月十一日葬於河南府永寧縣洛川鄉史原從舊阡也初公娶於滎陽鄭氏生三女而沒今蓋祔焉一子曰慶存方齟矣猶子前太原府參

軍扶執宗長書來請曰扶也早孤蒙世父常侍之覆露今其嗣幼未任克家姑封琴書司管籥以俟其長竊懼世父之德音不斂思有以垂於後者以誠告於從叔大司農復命曰俞謹礱貞石以乞辭無忽予昔爲郎與常侍同列已熟其行實及讀墓誌卽今丞相益州牧趙郡李公之文自稱爲忘形友其在宣州李公再入相議以第一官處之牢讓不取羔雁所禮則河東裴夷直天水趙哲隴西李行方吳郡陸紹梁國劉蕢博陵崔珣人咸曰得士夫揚州少與也而見器益州寡合也而見親六從事材不一也而畢樂

用是足以觀德庸可勿紀焉銘曰

隋有文中紹敷微言當時偉人咸出其門粹氣紆餘鍾於
後昆常侍恂恂文中來孫發源高麓中泳後大蘭芽茁然
秀出叢薈善不近名其聲日彰行勇於退其道愈光哲者
知之冥於周行以正持憲以文爲郎以和佐戎以惠臨邦
以直司諫以公駁政守於三川頑民底定乃鎮於宣先馳
淑聲邑中婆娑瞻我旆旌問誰詢謀濟濟君子問誰出納
潔潔廉士道本乎心暢於四支治本乎正形於百爲黠吏
斂手齊民揚眉江淮藪空夜析弗施公卧於齋邦民悽悽

公衣升屋邦民行哭牙璋斯來柳嬰言旋棠樹未老周人
慕焉熊耳之陽泱泱洛川佳城在茲既固且安松楸颺然
石馬矯然過者必敬宛陵之阡

唐故監察御史贈尚書右僕射王公神道碑

公諱俊字真長其先葉黃帝夫聖人之後與庶姓不同如
河出崑崙潛於厚地歛焉振起奮爲洪濶環迴自天非眾
川也故自黃帝八代而生舜武王克殷求有媯之允滿封
於陳是爲胡公十三葉生完自以公子國難不得立乃抱
樂器奔齊桓公以卿禮接之下又十一葉和以久爲政陰

決於人遂有齊國三代稱王至建爲秦所滅項羽入秦封
建孫安爲濟北王漢興失國齊人謂之王家因以爲氏安
子涓仕漢爲鎮東將軍青州牧封劇縣伯自涓至彤凡一
十九代兩漢公卿牧守如家牒然十代祖猛字景略符秦
尚書令仇秦成霸業與孔明佐蜀同功故時人謂之王葛
史云北海劇人遂著爲族望九代祖休儀曹尚書八代祖
鎮惡佐命宋長安擒姚宏至北齊五代祖昕七兵尚書兄
弟九人時號王氏九龍於齊史有傳高祖顓字君粹北齊
著作郎燕郡太守曾祖敬忠成州刺史大父上客高宗封

嶽進士及第歷侍御史主客兵部員外郎累遷兵右金吾

衛將軍冀州刺史靈州都督朔方道總管見職官儀及衣

闕烈考瞰宣州宣城縣令贈工部郎中娶河東裴氏乃生

僕射季睦餘力工爲文始以崇文生應深謀祕策考入上

第拜監察御史天之賦予莫能兩大旣揚令名而不以景

福享齡五十五葬於河南府偃師縣毫邑鄉後以子貴累

贈禮部尚書至右僕射夫人江夏李氏祔焉李門多奇才

父暄起居舍人暄子廊門下侍郎平章事高叔祖善蘭臺

郎崇文館學士注文選行於時善子邕北海郡太守有重

名四方之士求爲碑誌者傾天下故夫人於盛宗禮範可
法累贈至江夏郡夫人僕射有三子長子早終次子處元
少嬰沈恙慕道士養生之術高尚其趣強仕而沒積善不
試後來果大焉季子彥威字子美始以五經登甲科歷太
常博士祠部員外郎遷屯田郎中轉戶部司封並充禮儀
使判官宏文館學士京兆少尹諫議大夫史館修撰以直
諫出爲河南少尹入爲少府監司農卿改淄青節度使徵
拜戶部侍郎判度支勢逼生患出爲衛尉分司東都尋起
爲陳許節度使檢校禮部尚書充汴宋亳等州節度觀察

處置等使北海縣開國子食邑五百戶娶潁川韓氏主客
員外郎衢之女國子祭酒楊頊之外孫夫人有三弟皆材
無子早謝已如禮祔葬於亳邑原僕射厚德覆露之尚書
丕承之以蚤孤銳意嚮學嘗閱詩至蓼莪篇感激流涕故
其志如刃始淬及學成立遂爲鴻儒入用爲能臣參定儀
制財成經費起書生擁旌節今又領全師鎮上游握神符
垂三組皆嚮時感發之所激也志就而學成名聞而身達
欲報無所外榮中悲人子之孝在乎揚其先德以耀於遠
乃俾學古者書本系所自且銘於龜趺螭首云銘曰

山積而高澤積而長聖人之後必大而昌由聖與賢或爲
霸強建不克嗣濟北疏疆齊人德之其族稱王佐於秦
北海重光僕射之生負材而起策於萬乘擢爲御史同時
條對千目仰視桂林一枝拾芥相似名動海內夫豈不偉
種德而牙乃生令子出入鼎貴理財統師流根之澤密印
纍纍峻其追崇幽顯有輝孝嗣之志歎然弗怡春露秋霜
感傷履之時久能慕祿豐益悲明發不寐永懷孝思攄之
無窮曷若豐碑景毫之原佳城在斯乃金石刻揭於道陞
松耶柏耶有洛之湄過者必下來觀信辭